



Ա Ղ Ե Տ

(Հայաստանում տեղի ունեցած ավերիչ երկրաշարժի առթիվ)

«Ո՛ր տալիս ... զաչս իմ աղբերս սրտասուաց, և
լայի զժողովուրդս զայս զտիւ և զգիշեր»
(Երեմիա 9):

Ես ինչպե՛ս սգամ, ասա՛ ինձ, Աստված,
Մեր քյուր-քյուրավոր աղետյալներին,
Սիրտս է արյունում, տրտում եմ, տխուր,
Արհավիրքի դեմ՝ անբւտ, անբարբառ:

«Եղիցին կամք քո», մեռնե՛նք, չքանա՛նք,
Բայց երբեք մահից մենք չենք վախեցել,
Միայն պարտ է մեզ մարդու պես մեռնել,
Մարտիկի մահն պատվով, համարձակ:

Մահվան իսկ դեպքում թող այնպես մեռնենք,
Ինչպես դիմել են մահվան մեր մախնիք,
Ծարավով, տենչով սեզ արդարության,
Անշեջ տեսիլքով բարու հաղթության:

Մեր հարքն ասել են. «Մահ ոչ իմացեալ
Մահ է» և կորուստ, իսկ «մահ իմացեալ՝
Անմահութիւն է»: Պատգամն այս վսեմ
Պահած մեր սրտում՝ ապրենք աշխարհում:

Իբրև աղետյալ, մի՛ թող ընկնենք, Տե՛ր,
Առանց նպատակ ե առանց պայքար,
Մի՛ թող զոհ դառնանք մենք արհավիրքի
Փլատակներում կքած շենքերի:

Թող ընկնենք մարտում, պայքարի դաշտում,
Կուլենք չարի դեմ վասն արդարության,

Թափեմք մեր արյունն հանում հայրենյաց,
Քաջի պես ընկնեմք՝ մեր սրտից խոցված:

Արհավիրք էր սա, թե՛ մի պատուհաս՝
Մեր գլխին եկած այսքան վաղահաս,
Ո՛րն էր մեր մեղքը և մեր հանցանքը,
Տե՛ր, աղե՛տ էր սա, թե՛ մի պատուհաս:

Մենք այս օրերին վասն արդարության
Դարձած մարտիկներ, դռներ թակեցինք,
Խիղճեր փորձեցինք. լուռ էին մրանք
Անհողդողդ, անհույս, մեր հայցի դեմ փակ:

Զերթ ծով փոթորկվող հողն ալեկոծվեց,
Ահեղ դղրոմամբ աշխարհը շարժվեց,
Քառասուն վայրկյան երկիրը ցնցվեց,
Գյուղ, քաղաք քանդեց, բյուր կյանքեր խլեց:

Փլվեցին շենքեր, տներ, դպրոցներ,
Մանկապարտեզներ, հիվանդանոցներ,
Փլվեցին բազում արհեստանոցներ,
Թաղվեցին բազում շինարար ձեռքեր:

Աղետը քանդեց մեր տունն աղոթքի,
Կարծես եկել էր վերջը աշխարհի.
Աղետն այս անկուշտ, արհավիրքն այս կույր,
Ինչ որ հանդիպեց, քանդեց, տվեց կուլ:

Աշխարհն այս չքնաղ դարձավ գերեզման,
Լացեր ու կոծեր, կանչեր օգնության,
Խելագար ճիչեր, պաղատանք, ողբեր,
Հանկարծ լցրեցին ավերակներն մեր:

Քիչ առաջ այստեղ կյանքն էր բորբ եռում,
Իսկ այժմ մահն է եղերերգվում,
Մի բռպե առաջ ծիծաղ, խնդություն,
Այժմ փլատակ և մեռելություն:

Տե՛ր, բռպե՛ն էր այդ, բռպե՛ն չարիքի,
Զլանայիր մեզ թող այդ պահն ահի,
Հեռու տանեիր բաժակն այս լեղի,
Թող շարժը լիներ դաշտում ամայի:

Ո՛հ, ցավի՛ բռպե, բռպե՛ քանդումի,
Ո՛վ ինձ ետ կտար պահն արարումի,
Մեր տան հետ փլվե՛ց, քանդվե՛ց մեր ոգին,
Վշտի ու ցավի ատակ մեր հոգին:

Այսքան ավեր և այսքան արհավիրք,
Զոհեր բյուրավոր մենք ինչպե՞ս ողբանք,
Վշտից ցամաքեց արցունքն իմ աչքի,
«Եղէ ես որպէս բու յաւերակի...»

Ցավն այս սշտամաշ սահմանը անցավ,
Լապտերը հույսի հողմերից շիջեց,
Կայծակը զարկեց, մեր ծառը ճեղքեց,
Աղետն այս մեր տան հիմքերը սարսեց:

Մեր աչքի առաջ արևն խավարեց,
Խավարը եկավ աշխարհը պատեց.
Մի պահ կարծեցինք՝ հայ ազգն վերացավ,
Կանաչ մեր ծառը հիմքից չորացավ:

Ապավենը մեր դո՛ւ ես, դո՛ւ միայն,
Միյան դո՛ւ գիտես սրտերի ճամփան,
Ո՛ւժ տուր, վե՛ր կանգնենք, մեր տունը կերտենք,
Զարակամների ծաղրը անգոսնենք:

Ոսոխը չեղավ պատճառը մահվան
Բյուրավոր որդվոց զարմին հայկազյան,
Մնացինք անգոր, շփոթ ու անկար,
Բնության առաջ կարկամյալ, անբւտ:

Քո ողորմության դռները բա՛ց, Տե՛ր,
Վշտով ու սուգով լցվեց կյանքը մեր,
Աղետն հանգցրեց հույսի մեր ճրագ,
Մնացինք շվար, տո՛ւր մեզ սփոփանք:

Վշտից մեր աչքերն ընդմիշտ չորացան,
Ծիծաղ ու ժպիտ՝ ողբ, աղերս դարձան,
Կոկոնը թփի մեր թառամեցավ,
Մանկանց ճիչն ուրախ երկրից վերացավ:

Հուսահատությունն, անգույն ու տժգույն,
Անսպասելի իջավ մեր հոգուն,
Ողջերը դարձան աղքատ ու անտուն,
Մեր մեռելները՝ անթաղ, անարցունք:

Երբ գիշերն իջավ, խավարը պատեց,
Վիրավորների վայն աշխարհ լցրեց,
Փլատակներից ճիչեր ողբաձայն,
Խավարը լցրին կանչերն օգնության:

Ամեն ոք իրն էր ողբում ու հարցնում,
Գութի ծարավի սրտեր կոտտացին,
Հուսահատ մայրեր խելագարվեցին,
Ո՛վ պիտի բերեր դարման մեր վշտին:

Հանկարծ մարդկայինն ընդոստ վեր կանգնեց,
Աշխարհը ցնցվեց, խիղճը սթափվեց,
Ամեն կողմ կոչեր, կանչեր գթության,
Աշխարհը զարթոցեց, բերեց օգնություն:

Հասան օգնության ձեռքեր մերձավոր,
Եկան օգնության ազգեր հեռավոր,
Բերին սերն իրենց զերթ դեղ մեր ցավին,
Հազար մի բարիք փութով հասցրին:

Տե՛ր, ի՞նչ հրաշք էր սա և ձեռք գթության,
Մեր աղետն հանկարծ աշխարհը ցնցեց,
Թշնամանքն անգամ գութով պարուրվեց,
Մեր վերքը դեղվեց, մեր ցավը կիսվեց:

Մի՞թե մենք էինք նոխազ քավության,
Ամմեղ պատարագ, զոհ եղբայրության,
Զոհերն արդյոք մեր պիտ ամրացնեի՞ն
Կապն եղբայրության համամարդկային:

Տե՛ր, զոհողությունն այս Դո՛ւ ընդունիր
Իբրև պատարագ վասըն հաշտության,
Մեր զոհերն ընկա՛լ մեջն արքայության,
Նրանց թանկ արյամբ մեղքերն մեր քավիր:

Հավատում եմ, որ բարին է իշխում
Մեր այս աշխարհում, և միշտ պայքարում
Անսանձ չարի դեմ, անարդարության,
Վերջում սերն է միշտ հաղթում չարիքին:

Քո մարդեղության այս սուրբ օրերին
Մեր ցավն ամոքիր, մեր վերքերն բուծիր,
Սգավորներին Դո՛ւ մխիթարիր,
Մեզ ո՛ւժ պարգևիր ու հաստա՛տ պահիր:

Հակառակ բոլոր մխիթարությանց
Եվ մեզ կարկառած ձեռաց օգնության,
Հակառակ բազում խոր վշտակցությանց
Մեր վերքն է կոտտում, սիրտն է մեր քամվում:

Ծակատագրի հետ ես չեմ հաշտվում,
Ընդվզում եմ ես, բողոք բարձրացնում,
Ո՛վ ինձ ետ կտար իմ զոհվածներին...
Որքա՞ն վարդ խամրեց հա՞յոց պարտեզում:

ՆԵՐՍԵՍ ՎԱՆԱԿԱՆ

27 դեկտեմբեր 1988 թ.